

Govor člana Delegacije Parlamentarne skupštine Bosne i Hercegovine u Parlamentarnoj skupštini Vijeća Evrope (PSVE) Mladena Bosića na prvom dijelu redovnog zasjedanja PSVE tokom rasprave o poštivanju obaveza i angažmana Bosne i Hercegovine kao države članice Vijeća Evrope

Strazbur, 24. januar 2018.

"Prije svega, zahvaljujem se izvjestiocima gosp. Galeu i g. Coxu na naporima u pokušaju da napišu objektivni i nepristrasni izvještaj. To nije lak zadatak kada je BiH u pitanju.

Započet ću raspravu sa slavnom rečenicom Lava Tolstoja da su sve sretno porodice iste, a svaka nesretna porodica je nesretna na svoj način.

Ovo se može primijeniti i na države. Sve stabilne i uspješne države su iste, a sve države s problemima u funkcionisanju imaju posebne razloge i uzroke svojih problema.

BiH je specifična država napravljena dejtonskim mirovnim procesom. Struktura BiH je načinjena pod međunarodnim pritiskom kako bi se zaustavio rat. Dejtonski ustav je složen i proces donošenja odluka je spor zbog složenosti zemlje. Morate imati na umu da je takav proces donošenja odluka potreban kako bi se uklonili strahovi i ispunili interesi tri konstitutivna naroda i ostalih koji žive u BiH.

BiH nije potpuno suverena država znajući da imamo Kancelariju visokog predstavnika sa širokim rasponom ovlaštenja i EU trupe na terenu, kao što znate Ustavni sud ima trojicu međunarodnih sudija od njih devet. Ostalih šest sudija su po dva iz svakog konstitutivnog naroda. U izvještaju se ne spominje da bi glavni cilj trebao biti da BiH funkcioniše kao bilo koja druga suverena država.

Narodi u regiji Zapadnog Balkana često su bili žrtve interesa velikih sila. Sa žaljenjem primjećujem da opet imamo velike zemlje koje igraju svoje igre na području Zapadnog Balkana. Imali smo dovoljno sukoba u bliskoj prošlosti, i bila bi tragedija ako se oni ponove.

Naravno, mi kao lokalni političari smo odgovorni za političku stabilnost zemlje i regije. Međutim niko ne smije isključiti odgovornost međunarodne zajednice i susjednih zemalja za situaciju u BiH.

I konačno, mislim da je glavni problem države korupcija na najvišim nivoima i nesposobnost institucija da se bore protiv nje. Dakle, reforma pravosuđa je najbitnija kako bi zemlja mogla krenuti naprijed."